

आकाशवाणी

1. दिल्ली असैम्बली चुनाएं लेई वोटें दी गिनतरी अज्ज बड्डलै सख्त सुरक्षा बंदोबस्तें हेठ शुरु होई गेदी ऐ। 11एं जिलें च वोटें दी गिनतरी लेई 19 केन्द्र बनाए गेदे न।
2. केन्द्री मंत्रिमंडल नै स्किल इंडिया प्रोग्राम लेई 8 ज्हार 800 करोड़ रपे मंजूर कीते न। मंत्रिमंडलै सफाई कर्मचारिएं लेई राश्ट्री आयोग दी अवधि गी बधाई दित्ता ऐ।
3. प्रधानमंत्री नरेन्द्र मोदी होर औंदे सोमवार थमां फ्रांस ते अमरीका दी यात्रा पर जाडन।
4. प्रधानमंत्री होरें मनोरंजन, रचनात्मकता ते संस्कृति दी दुनिया गी किट्ठे इक्कै मंच उप्पर आह्णने आह्ले वैश्विक शिखर सम्मेलन— वेक्स दे सलाहकार बोर्ड दी इक बैठक लाई।
5. टेनिस च मुंबई च खेड्डी जा करदी एल एंड टी मुंबई ओपन प्रतियोगिता च माया राजेश्वरन महिलाएं दे सिंगल्स मुकाबले दे सेमीफाईनल च पुज्जी गेइयां न।

<><><><><><>

Delhi Polls

दिल्ली विधानसभा चुनां आस्तै वोटें दी गिनतरी अज्ज बड्डलै 8 बजे शुरु होई गई। दिल्ली दे 11 जिलें च 19 मतगणना केन्द्र स्थापत कीते गे न। आकाशवाणी संवाददाता नै दस्सेआ जे वोटें दी गिनतरी गी दिक्खदे होई राश्ट्र राजधानी च सुरक्षा इंतजाम सख्त कीते गे न। केन्द्र सशस्त्र पुलस बलें दी 38 कंपनियां, 19 मतगणना केन्द्र दे आले दुआले तैनात कीतियां गेइयां न। मकामी पुलस मतगणना दी प्रक्रिया गी पारदर्शी ते सेही तरीके कन्नै तोड़ चाढ़ने आस्तै प्रत्याशिएं ते जिला चुनां अधिकारिएं कन्नै तालमेल कन्नै कम्म करा'रदी ऐ। चुनां आयोग दे दिशा—निर्देश मताबक केन्द्री सशस्त्र पुलस बल सुरक्षा आस्तै तैनात न ते मकामी पुलस मतगणना आली थाहरें ते दाखल होने आस्तै पैहले प्रवेश थाहर दी सुरक्षा दिक्खा'रदी ऐ। हर मतगणना केन्द्र दे बाहर 100 मीटर दे घेरे च नाक्के लाए गेदे न तां जे सिर्फ अधिकृत व्यक्ति गै अंदर जान। पिछले बुधवार होए दे चुनाएं च त्रै पार्टिएं च मकाबला दिक्खने गी लब्बा,

जेहदे च बीजेपी, आम आदमी पार्टी ते कांग्रेस दे 699 मेदवार चुनावी मैदान च हे। राष्ट्री राजधानी च सरकार बनाने आस्तै पार्टी गी 36 सीटें पर जित्त हासल करने दी लोड़ ऐ।

<><><><><><>श

Skill India

सरकार नै स्किल इंडिया प्रोग्राम आस्तै 2022–23 थमां 2025–26 तोड़ी 8 जहार 8 सौ करोड़ रुपे गी मजूरी दित्ती ऐ। मीडिया कन्ने नमीं दिल्ली च मुखातिब होंदे होई सूचना ते प्रसारण मंत्री अश्विनी वैष्णव होरें आखेआ जे मंग गी दिक्खदे होई कौशल विकास सरकार दी प्राथमिकता ऐ ते गुणवत्ता गी बधाना ते अभिसरण पर मती तवज्जो दित्ती जाग। उनें आखेआ जे एहदे कन्नै हुनरमंद भविक्ख लेई तैआर कार्यबल गी तैआर करने दा सरकार दा धेइया साफ होई जंदा ऐ, जेहदे आस्तै पूरे भारत च जरूरत साहब्बै तकनीकी प्रशिक्षित लोक तैआर करने आस्तै, उद्योग सरबंधी प्रशिक्षण कार्यक्रम चलाए जा'रदे न। प्रधानमंत्री कौशल विकास योजना 4.0, प्रधानमंत्री राष्ट्र शिक्षुता प्रचार योजना ते जन शिक्षण संस्थान योजना गी रलाइयै स्किल इंडिया कार्यक्रम दे हेठ कीता गेआ ऐ। वैष्णव होरें आखेआ जे सरकार नै सफाई कर्मचारिएं आस्तै राष्ट्री आयोग दा कार्यकाल त्रै ब'रे आस्तै बधाई दित्ता ऐ जेहड़ा गै 31 मार्च 2028 तोड़ी होग।

<><><><><><>श

Tripura Skill Devp

त्रिपुरा दे मुख्यमंत्री मानिक साहा होरें स्किल उदय टंगाई ब'रे दे कौशल विकास प्रशिक्षण कार्यक्रम दी त्रिपुरा इंस्टीच्यूट ऑफ टेक्नालोजी च शुरूआत कीती। उनें आखेआ जे प्रशिक्षण कार्यक्रम 80 जहार स्कूल ते कालेजें दे छात्रें गी सशक्त बनाने दे मकसद कन्नै शुरू कीता गेआ ऐ। मुख्यमंत्री होरें दस्सेआ जे उनें केई नमें कार्यक्रम शुरू कीते न जेहदे च राज्य एमआईएस पोर्टल शामिल ऐ जेहड़ा गै 983 स्कूलें दे 70 जहार छात्राएं आस्तै करियर गरंटी प्रोग्राम चला'रदा ऐ जेहदे च विद्यार्थिएं गी उंदे भविक्ख बारे परामर्श दित्ता जंदा ऐ। एहदे अलावा 7 जहार कालेज दे छात्रें आस्तै एनएसडीसी कार्यक्रम ते रोजगार उद्यमिता दे बढ़ावे आस्तै बी कार्यक्रम शामिल न।

<><><><><><>श

CM-Pre Budget

मुख्यमंत्री ओमर अब्दुल्ला होरें अपनी सरकार दे पैहले बजट शा पैहले जम्मू च विधायकें ते जिला विकास कौंसल दे अध्यक्षें कन्नै बैठका लाइयां ते बजट च लोकें दी हिस्सेदारी पर जोर पाया ऐ। सलाह-सुत्तर आहली इ'नें बैठकें च पुलवामा ते रियासी थमां विधायकें, जिला विकास काउंसलें दे अध्यक्षें ते होरनें सरबंधत धड़ें हिस्सा लैता ते बजट लेई अपने सुझाऽ ते विचार सांझे कीते। इस दरान विधायकें ते डीडीसी मिंबरें ढांचागत विकास, रोजगार दे मौकें ते ग्रामीण अर्थबवस्था गी तगड़ा बनाने, बिजली सप्लाई, होर प्रबंधन, स्कूलें ते अस्पताल च लोड़चदी गिनतरी च अमला, पूलें दा निर्माण, सेहत केन्द्रें दा दर्जा बधाने, नमिएं सैलानी थाहरें ते पार्कें दा निर्माण, गडिडियां खडेरने लेई पार्किंग सरबंधी मामलें उप्पर मुख करी ध्यान केन्द्रित कीता गेआ। मुख्यमंत्री होरें जकीन दोआया ऐ जे उंदी सरकार, जम्मू-कश्मीर दे पूरे-पराते ते सामे विकास सने असरदार ढंगै'नै लोकें दे मसले नबेड़ने गी तरजीह देग।

<><><><><><>श

JK Anganwaris

केंद्र सरकारै दुए चरण दे मिशन सक्षम आंगनवाड़ी ते पोषण कार्यक्रम दे तैहत जम्मू कश्मीर च बेह्तरी आस्तै 338 आंगनवाड़ी केंद्रें गी मंजूरी दित्ती ऐ। विकसित सक्षम आंगनवाड़ी केन्द्रें च बच्चे ते माताएं लेई एलईडी स्क्रीन, साफ पानी उपलब्ध करोआने आहलियां मशीनां, पोषण वाटिका ते पढ़ाई-लखाई दा समेयान होग। इस पैहल दे तैहत, पोषण ते शुरुआती दिक्खमाल सेवाएं च सुधार आहनने दा लक्ष्य रक्खेआ गेआ ऐ। पूरे भारत च 2 लक्ख आंगनवाड़ी केंद्रें दा आधुनिकरण कीता जा'रदा ऐ ते अगले 5एं ब'रें च 50 ज्हार नमें आंगनवाड़ी केंद्र बनाने दी योजना ऐ।

<><><><><><>श

France PM Visit

प्रधानमंत्री नरेन्द्र मोदी सोमवार थमां फ्रांस ते अमरीका दी यात्रा पर जाडन। उंदी एह जात्तरा आर्टिफिशियल इंटेलीजेंस, रक्षा बपार ते सामरिक भागीदारी पर विशेष रूप कन्नै केन्द्रित होग। श्री मोदी होर पेरिस च फ्रांस दे राष्ट्रपति इमैनुएल मैक्रो हुंदे कन्नै ए.आई. एक्शन शिखर बैठक दी सांझे तौरा पर अध्यक्षता करडन। इस बैठक च नैतिक ए.आई. प्रशासन ते वैश्विक विनियामक ढांचे पर विशेष चर्चा होग। गल्लबात दे एजेंडे च रक्षा सैह्योग ते आर्थिक सरबंध प्रमुख रूप कन्नै शामिल न। प्रधानमंत्री होर मारशैले बी जाडन, जित्थे ओह

मजारगस वार सिमटरी च पैहले विश्व युद्ध च मारे गेदे भारती सैनिकें गी श्रद्धांजलि देडन। ओह राजनयिक सरबंधें गी मजबूत करने लेई नमें भारतीय वाणिज्य दूतावास दा उद्घाटन बी करडन। प्रधानमंत्री मोदी होर फ्रांस थमां वाशिंगटन लेई रवाना होडन जित्थे ओह अमरीका दे राष्ट्रपति डॉनल्ड ट्रम्प हुंदे कन्नै मलाटी करडन। श्री ट्रम्प हुंदे दुई बारी अमरीका दा राष्ट्रपति बनने परैन्त श्री मोदी हुंदी उंदे कन्नै एह पैहली बैठक होग। स्हाड़े संवाददाता नै दससेआ ऐ जे दौनें नेताएं दी दपक्खी गल्लबात च बपार, रक्षा सैहयोग ते इमिग्रेशन दे मामले शामिल होडन।

<><><><><><>श

PM Waves

प्रधानमंत्री नरेंद्र मोदी होरें मनोरंजन, रचनात्मकता ते संस्कृति दी दुनिया गी किट्ठे आहने आहले वैश्विक शिखर सम्मेलन— वेक्स दे सलाहकार बोर्ड दी इक बैठक कीती। उनें अभिनेता अमिताभ बच्चन, दिलजीत दोसांझ, रजनीकांत, शाहरुख खान, रणबीर कपूर, चिरंजीवी, अनिल कपूर, अक्षय कुमार ते अनुपम खेर हुंदे सने देश—दुनिया दे आला दर्जे दे पेशेवरें कन्नै बी गल्लबात कीती। उनें संगीत निर्देशक ए.आर. रहमान, रिलायंस इंडस्ट्रीज दे अध्यक्ष मुकेश अंबानी, माइक्रोसॉफ्ट दे सी.ई.ओ. सत्य नडेला, महिंद्रा एंड महिंद्रा दे चेयरपर्सन आनंद महिंद्रा ते होरनें शख्सियतें कन्नै बी मलाटी कीती। इक सोशल मीडिया पोस्ट च, प्रधानमंत्री होरें आखेआ जे सलाहकार बोर्ड दे सदस्य, जीवन दे बक्ख—बक्ख खेत्तरें दे प्रतिष्ठित व्यक्ति न। मोदी होरें आखेआ जे इ'नें सब्बनें नां छड़ा अपना समर्थन दोहराया, सगुआं भारत गी आलमी सतह दा इक बड्डा मनोरंजन केंद्र बनाने दे जतनें गी होर कि'आं बघाया जा, इस बारै बी अपने विचार सांझे कीते।

<><><><><><>

India Solar

भारत नै परतियै इस्तेमाल करने आहली उर्जा च इक वैश्विक नेता दे रूपै च अपनी स्थिति गी मजबूत करदे होई 10 जी.डब्ल्यू स्थापित सौर उर्जा क्षमता गी पार करियै इक ऐतिहासिक मील दा पत्थर हासिल करी लेया ऐ। नमीं ते परतिये इस्तेमाल करने आहली उर्जा मंत्रालय नै इक बयान च आखेआ जे एह उपलब्धि इक साफ—सुथरी हरियाली दे भविष्य लेई देश दी बचनबद्धता लेई इक दस्तावेज जनेई ऐ। एह प्रधानमंत्री नरेंद्र मोदी हुंदेआसेआ तय 2030 तोड़ी गैर जीवाश्म ईंधन आधारित उर्जा क्षमता दे 500 जी डब्ल्यू दे महत्वकांक्षा आहले लक्ष्य

गी साकार करने दी दिशा च इक महत्वपूर्ण गैं ऐ। नमीं ते नवीकरणीय उर्जा मंत्री प्रहलाद जोशी होरें आखेआ जे पिछले 10 बरें च भारत दी उर्जा जातरा ऐतिहासिक ते प्रेरणादायक रेही ऐ। उनें जिक्र कीता जे सौर पैनल, सौर पार्क ते रूफटॉफ सौर परियोजनाएं जनेई पैहल नै क्रांतिकारी बदलाव आहन्नेया ऐ।

<><><><><><><>

Rajnath

रक्षा मंत्री राजनाथ सिंह ते अमरीका दे रक्षा मंत्री पीट हेगसेथ होरें कल जमीन, हवा, समुंद्र ते अंतरिक्ष सनें बक्ख-बक्ख क्षेत्रें च दवै मुख्ये बश्कार रक्षा सैहयोग दी समीक्षा कीती। दवै लीडरें मुख्ये बश्कार टेलीफोन उप्पर होई दी गल्लबात च राजनाथ सिंह होरें हेगसेथ होरें गी अमरीका दा रक्षा मंत्री नियुक्त होने दी बधाई दित्ती। दवै लीडरें दपक्खी साझेदारी दी सराहना कीती ते रक्षा सैहयोग मजबूत करने दी वचनबद्धता गी इक बारी परतियै पक्का कीता। दवै लीडरें प्रौद्योगिकी सैहयोग, रक्षा, सूचना साझेदारी ते संयुक्त सैन्य अभ्यास जनेह विषे उप्पर मिलियै कम्म करने दा फैसला कीता।

<><><><><><><>

Asian Games

9मीं एशियाई शीतकालीन खेड्डां 2025 अज्ज थमां शुरू होआ'रदियां न ते 14 फरवरी तगर चीन दे हाबीन च आयोजित कीतियां जांगन। भारत च सयालु खेड्डें गी बढ़ावा देने लेई इक एतिहासक गैंह दे रूपै च सरकार नै एशियाई सयालु खेड्डें च भारतीय दल दी भागीदारी लेई मंजूरी दित्ती ऐ, जेहदे च 59 एथलीट ते 29 टीम अधिकारी शामिल न।

<><><><><><><>